

皇

清

奏

議

皇清奏議卷五十三

善安西建置疏 乾隆二十七年

楊應琚

陝甘總督臣楊應琚謹 奏為新疆之規模大定安西之建置宜善謹先縷晰敷陳仰祈 睿鑒事 竊照口外安

西府治東接肅州西通哈密為中外出入之咽喉臣前因

奉 命查勘新疆於乾隆二十四五年節次往返經臨

其地見安西以西自白墩子等處至哈密計程八百七十

五里設軍臺十處其間廓壁綿長水草乏缺馬駝至此易

致損傷來往商民多稱未便且各臺額設塘遞馬匹應需

草料均須長途運難經 臣奏請將安西三縣莞豆種成

不由肅州運送而自安西前赴哈密程途尚遠運費尚復

不貲方今疆域恢宏輪蹄如織未便因循邊就謹按雍正

四年間前督臣岳鍾琪於理安西事宜案內以沙州為西

陸緊要之區初次具奏原欲於沙州設鎮即今日之敦煌縣治也嗣因杜爾伯特地方在沙州迤北二百餘里易於應援故復奏准於杜爾伯特設鎮即今日之安西府治湖泉縣也其沙州則酌議設立副將管轄二營駐兵一千五百名過有調遣之處安西與沙州兩路分兵並進俾成犄角之勢但今葦蕩久已蕩平安西已成腹地提臣現在移駐巴里坤其安西城內止設叅將一員前後奏准駐兵八百名情形已迥非向日可比且安西府城亦建設廓壁之內米糧食物等項或須仰給於沙州而沙州則土田廣沃物產饒裕達勝安西指之志乘漢晉以沙州為敦煌郡唐設沙州刺史元為沙州路自歷代以來無不以沙州為郡治况我皇上拓疆二萬餘里規模宏大遠邁前朝而乃於中外總滙之要區則砂碛綿亘一望無垠似非所以

利行程壯形勢節繁費也。臣體訪輿情咸以府治與軍臺均宜移設沙州為便。隨於上年秋間遣委明幹委員前往安西沙州之總路。隨自靖遠營歷八道溝南折而至沙州。處處水草豐裕。又自沙州歷可可砂石等處而至哈密。沿途有水草之處亦多。而可可砂石更有草湖數百里。綠緝湖漫取用不窮。附近處所均堪割運。此外凡有水遠之處亦俱有舊井。因年久淤塞。泉眼不通。止須撥夫掏濬。堪供飲喂。臣又以該處水草雖屬近便。而冬間或恐積雪深厚。有礙行人。復於上年十一月內。委員往勘。本年四月間。又令帶同匠役前往。查丈道路。開濬井泉。並隨帶車輛。沿途試行。嗣據先後回稟。沙州附近南山地氣溫和。雖遇隆冬。堪以進行。無阻。至自靖遠至沙州。用繩丈量計程四百里。又自沙州至哈密。丈量得六百二十五里。共程一千二十

五里較至靖逆歷安西而至哈密共程一千一百八十五里實計近一百六十里其沙州以西凡有舊井俱已掏濬深通水泉湧出沿途間有山石嶺崎之處亦令匠役開鑿平坦用所帶車輛逐處試行毫無阻滯臣查沙州一帶既道路平坦水草近便而輟之行走安西又近一百六十里則移設府治軍臺洵於公私交有裨益且道路既近則各臺輓運糧草自可節省脚費約銀一萬八千餘兩此外運送餉鞘紬緞紙張藥材等項每年節省之運費與每屆官兵換班節省之脚費更難僕數臣悉心酌核似應俯順輿情將安西府治與軍臺俱移設沙州即以沙州現設之敦煌縣為附郭首邑往來一切供應就近在府庫支發而知府東有玉門西有敦煌北有淵泉道足居中統率且計現在所費不過如改移臺站建蓋知府等衙署為數有限而

後頻年之節省諸凡之利便實屬永遠無既况安西府城自吳臣移駐巴里坤以後參將所轄兵馬無多而地當孔道差務紛繁辦理恒虞竭蹶若改府治於沙州則該處本係副將駐劄兵丁倍於安西承辦差務自無貽誤又不僅移達就近節經費便行人已也且沙州本為關外安西第一沃壤而移設府治裨益地方事所應行况經費既多節省軍民又多稱便而該縣之繁庶更遠勝於安西是以經臣委勘之後商民靡不聞風踴躍現有稟請於道旁建蓋店房以待移設軍臺者但事關重大必須且親往勘明始可詳悉定議且現擬六月初起程前赴沙州一帶將移設府治改安軍臺之處切實確勘妥議繪圖貼說另行奏請

聖訓外理合先將府治軍臺應行移設暨臣現擬親

往查勘緣由恭摺奏

聞

酌籌甘省茶政疏乾隆二十七年

楊應琚

陝甘總督臣楊應琚謹 奏為查議具奏事伏查甘省五

司庫貯官茶其最陳者起於乾隆七年現今尚存一百一

十八萬二千餘封陳陳相因艱於售變誠如 聖諭必

須通盤核計妥籌辦理始可冀公私交有裨益臣隨將現

在遵 旨備查原案確訪情形務期籌辦妥協另行具

奏緣由亦經恭摺 奏覆奉有 硃批一面以籌計疏

銷固須官為調劑而茶務積累已深亦須面詢商人始可

得其肯要行文蘭州布政使調取商頭怡緒遠等來肅面

加細詢並以甘省滿漢各營自定議搭餉以來已奉行兩

載有餘兵丁是否俱有餘利不致抑勒勉強並此外應如

何設法調劑又札行布政使吳紹詩兼理茶務之洮岷道

武忱護臨洮道增福暨滿漢各營詳細確查具覆至新強

地方當此生聚漸繁物產豐裕之時茶餉一項自所必需但各處每歲應需茶若干暨應作何攜帶分貯俾日久積少成多之虞亦經札詢各處辦事大臣查明定議茲准據口內口外各處陸續查明具覆前來臣復博訪輿情詳考業據逐一通盤核議臚列條款恭呈

聖鑒

一官茶應改徵折價也謹按甘省額設茶引二萬七千二百九十六引每引行茶一百觔交官中馬五十觔中馬五十觔聽商自賣外帶附茶十四觔為運脚之費以每五觔為一封合計交官茶二十七萬二千九百六十封商人自賣正附茶三十四萬九千三百八十八封康熙四十四年因中馬例停需茶無多議將應交官茶改收折價每封繳銀二錢其商人仍准每引全配正附茶一百十四觔嗣於康熙六十一年因庫茶無幾議將每引交官茶五十觔仍

收本色乾隆元年復因庫茶存積較多議改折色每封增銀一錢共收折價銀三錢其折價茶封不准配運商人止每引配正茶五十觔並附茶折半減為七觔共以五十七觔行銷迨乾隆七年又議將折價仍收本色十三年復以庫茶銷變維艱酌請將應交本色官茶以二成徵收本色八成改徵折色每封仍收價銀三錢商人除交二成官茶每引十觔共茶五萬四千三百九十二封外其自賣之茶仍止准每引配運正附五十七觔連二成本色附茶一觔六兩零共止配運正附茶三十一萬八千八百七十七封乾隆二十一年前撫臣吳達善以康熙四十四年改徵折價之時原係聽商按引全配迨乾隆元年以後遽將折價茶封不准配運遂致商力疲乏 帑項懸久 奏准將每引八成改折茶四十觔附茶五觔九兩零俱照康熙四十四

年之例聽其全行配售以紓商力計每年應增配茶二十萬八千九百三十九封此歷年徵收本折暨商茶增配之原委也是甘肅庫貯官茶向例如遇存積過多則請改徵折色如庫貯無幾復請徵收本色原係隨時權衡調劑期於公私交有裨益今五司庫內自乾隆七年至二十四年已存積至一百五十餘萬封經前撫臣吳達善於二十四年奏准每封作價銀三錢搭放兵餉當奉行之始兵丁領獲茶封尚有餘利今行之二年有餘已搭放過茶四十萬餘封現在市肆官茶日多價值漸減兵丁無利可圖率皆不願多領是以尚貯存茶一百十八萬二千餘封連巴里坤哈密存貯茶六萬八千餘封共茶一百二十五萬餘封一時遽難銷售今伏讀 諭旨兵丁果有餘利則官茶不無損價若官茶但利疏銷又豈能抑勒兵丁勉強從

事其中必無兩利俱存之理欽此仰見我

皇上日月

照臨無微不至燭即以現在滿漢各營暨口外各處辦事大臣查覆實在應需茶封數目統計每年亦僅能銷茶十餘萬封非十年之久不能全數疏銷且每年商人又增配茶二十四萬餘封商茶既多官茶自必益加壅滯其按年應交二成官茶若仍聽其照常交納勢至陳茶銷售無幾新茶又相繼堆積疏通無日霎變堪虞臣悉心酌議莫若將商人應交二成官茶五萬四千餘封暫停交納照例每封折價銀三錢俟陳茶銷售將完再請徵收本色庶清源即可溯委庫貯陳茶自當漸次疏銷矣

一商茶應准其減配也查甘省茶法商人每引交茶五十觔無論本折即係額課此外尚有捐助茶規官禮等項查出充公銀三萬九千餘兩亦係按年交納無殊正供至高

人自賣茶封每引自應配正茶五十觔運附茶共止配售三十餘萬封該商等即以配售三十餘萬封之茶完納前項應需之課其乾隆二十一年前撫臣吳達善奏准增配茶二十四萬八千九百三十九封原係例外加增以紓商力並無課項第茶封既已加增則湖南採買價值亦即較前昂貴迨運至甘省又有庫貯官茶搭放兵餉遂至市價日減商茶亦須賤售該商等不特餘利無幾而連年配運之茶兼亦頗有積滯此後若仍按年如數配運勢至愈積愈多難免停本虧折是以該商等呈請前撫臣明德情願將前項增配無課茶斤減配八萬餘封以期易於銷售俾商本不致停滯至有課茶封仍係照常行銷則應輸課項自應照例完納緣明德原奏內未及詳晰叙明致蒙

睿詢今臣復細詢商頭怡緒達等據稱地方食茶民番大

概止有此數而茶勅歷久行銷應售價值亦為民番所稔
知今官茶商茶既有塵積欲同時一體疏銷除減配之
外別無良法前請減配茶八萬餘封為數尚少於事無濟
今酌中等計查商等自乾隆十三年定議二成八折交收
以除交官二成本色茶封外應配白膏有課正附茶三十
一萬八千八百十七封連乾隆二十一年奏准增配無課
茶二十四萬八千九百三十九封共應配茶五十六萬七
千七百五十六封核計每引一道應配茶二十四封四勅
今情願每引一道正配茶十五封內應酌減無課茶一十
五萬八千三百十六封共止配茶四十萬九千四百四十
封至二成本色茶封現既酌議改徵折價自亦無庸配運
如此則茶商行銷較易不致停本賤售而課項又係照常
完納且商茶既減則官茶亦易銷售實於公私交有裨益

等語臣復札行布政使吳紹詩等細加確核據稱該商等所稟情詞實係因時籌酌公私兩便事屬可行仍俟茶餉疏通之日另請照舊配運等因稟覆前來臣應請俯如所請辦理以利疏銷

一陳積茶封應請召商減售也查各司俱有陳積茶封而惟洸司為最多該司地處偏僻艱於銷售曾經前撫臣吳達善於乾隆二十五年奏准將此後應交銀茶俱改歸甘莊二司交納其從前存積陳茶俟搭餉完日即將洸司裁汰無如該處附近止有兩營額設官兵無幾自定議搭餉以來止搭放過茶九千餘封現今庫內尚貯存乾隆七年至十八年陳茶三十三萬餘封計非數十年不能搭完而此項茶封約值銀十餘萬兩如聽其再行存貯勢必日漸霉變帑項虛懸是以乾隆二十六年前撫臣明德奏請

照現在搭餉每封三錢之價名商售變以期漸次疏銷部
議酌中核定行令每封以四錢發賣等因惟是官茶名為
黃封色淡味薄向不如商附黑茶之易於銷售今又存貯
多年色味更不如前若不量減價值勢至領買無人且今
自有搭放之例民間於二年之內又添官茶四十萬餘封
茶愈多而價愈減兵丁領發茶餉食餘零買或錢或糧彼
此交易總不出每封三錢之價而名商變賣則以每封四
錢發售價值既貴成色又低商民無利可獲現皆裹足不
前故自准到部咨以後迄今並未售變一封若不另行定
議則名商變賣仍屬有名無實臣詳加酌核應請仍照前
撫臣明德原議每封定價三錢名商變賣至甘莊二司存
茶尚非過多口外所需向由該二司撥運無庸議銷外河
西二司共存茶六十餘萬為數較多除陸續搭餉外如該

處商民有情願照搭餉三錢之價前赴各司領買者亦准其一體交價售變如此則陳茶廣為疏通不致積久霉泥實於帑項有裨

一內地新疆應一體搭放也查乾隆二十四年前撫臣吳達善奏准茶封搭餉案內聲明自二十五年為始今滿漢各營自行酌定茶數每封作價三錢於餉銀內以一二三成搭放等因價值既為適中兵丁獲沾惠濟今自搭放兩載以來兵丁雖因市價漸減不願多領然自行食用之茶亦在所必需臣移行甘省滿漢各營查明每年實在需用茶共十二萬餘封具覆前來此皆按照營分大小兵丁日用之多寡距茶司道路之遠近及該處銷售之難易各從兵便據實定議並無稍有勉強應請按季照數搭放以廣惠澤至新疆地方現在生聚漸繁米糧蔬果物產在在

豐裕惟茶餉一項向須取資於內地誠如 聖諭各處

濟用自屬多多益善臣隨令各處辦事大臣查明每年共
需茶二萬七百餘封又准伊犁等處辦事大臣等咨稱新
疆地方遠近不一軍臺駝馬額設無幾若於遞送文報之
外再令轉運茶封必致勞傷疲乏恐難兼顧不若雇覓牲
畜陸續運解分貯今官領買其本脚價銀即在官兵月支
鹽菜銀兩內隨時坐扣在官兵雖稍出脚價然較之商賣
價值尚賤於官兵既多利益 帑項不致虛糜而臺馬亦
可免傷斃添補之煩等因移覆到臣伏查新疆商賣茶價
現准各處咨覆大概每封需銀二兩四五錢並二兩上下
不等今官茶運至新疆各處除自各司至肅州沿途陸續
載運無庸雇覓牲畜攤算脚價外其自肅州運至各處如
雇覓牲畜轉將脚費攤入茶本之內於領茶官兵月支鹽

菜銀兩內扣還核計應需本脚較之買自商賈既多減省而臺馬又不致勞傷實於公私有益自應如伊犁辦事大臣等所議辦理至將來如遇有換班官兵出口亦應令其隨便酌量攜帶庶運費並可節省再巴里坤哈密現在貯存茶六萬八千餘封所有新疆需用之茶自應先儘此二處就近撥運俟撥運將完再由內地各自運往如此則內外銷售事易集而利亦普矣以上各條臣悉心酌核並合之布政使吳紹詩泚岷道武忱等議覆情節均與臣意見相同謹詳細繕摺恭 奏

陳招墾淮北事宜以廣生計疏

乾隆二十七年

陳宏謀

湖南巡撫革職留任臣陳宏謀謹 奏為淮北水患已除
荒土猶多敬陳招墾事宜以廣生計事臣前 奏請赴京
面陳江南未辦之事欽奉 硃批具摺奏來欽此緣江

南海州濱海漲地彌望無際除近海鹵地晒鹽甚易臣已奏請查辦其雲臺山下淤出高地儘可耕種又自蒙

聖恩廣開河溝以後諸水歸海涸出之地可耕者亦更不少約計可墾之地不下數千頃土力甚厚以之種麥則翻犁一過即可有收以之種稻不過二三年即成水田臣諮詢本地紳民僉云地廣人少無力耕墾至於淮徐兩屬除低窪之地已蒙 聖恩豁減糧賦留為蓄水之區此外

皆係可耕之地乾隆二十四年已蒙 聖恩借給牛種

銀二十餘萬兩年來荒地多已墾復所借牛種亦已歸還歲收屢稔臣往來巡歷安東邵宿等處可墾未墾之地尚多今春 聖駕南巡屢念邵宿一帶地方水患已深尚少起色 訓諭臣等悉心經理臣思淮徐海地方地廣

人稀農力不勤現在已墾之地率皆耕耨不深糞力全無

是非廣種薄收未足盡其地利而蘇松常太各府州農民
最勤又苦人多地窄無田可耕若招徠無地窮民給以牛
種廬舍撥地開墾先就海州開墾次及淮徐以漸推廣可
使地無遺利民有恒業惟牛種等費必須仰給於官若動
支公帑不無借給扣運之煩仰請 聖恩將現開豫工
事例內捐納貢監職銜等款移於淮北墾田許官生捐資
認墾議叙墾熟之後按畝輸租積存備贍於國計民生兩
有裨益謹將招墾事陳列於後

一墾田先海安而次及邳宿先委道府大員督同地方官
並帶佐雜各員逐一勘丈分別官荒民業或開水田或為
麥地畫清界址註明區段頃畝編號造冊用印存案將來
認墾領耕以此為據墾成之後造冊報部即為官產底冊
存之該縣即為魚鱗號冊

一 招佃墾田每墾一頃所需牛種籽種及修補溝洫計需費一百二十兩水田需費倍之成熟之後每畝麥田納麥租二斗水田納穀四斗官給印照永遠存佃為業

一本首外省官生開墾成麥田一頃准作銀一百二十兩水田尚須開溝築圩等費非一年所能成熟墾成一頃准作銀二百四十兩均於成熟輸租之後方給執照達部照豫工事例議叙除即選即用及道府正任各項不准外凡捐貢監生及同知通判以下佐雜空銜許其指捐議叙如官生不能自為招墾者許其納銀司庫藩司即給實收咨部議叙其銀轉發招墾另請題銷

一 本地有荒地最多之戶自己招佃開墾成熟之後一體輸租議叙仍聽永遠耕種輸納官租

一 淮徐地方賦額本輕田價甚賤凡有荒地而無力招墾

者聽官生認墾捐官成熟之後一體輸納官租將額賦豁除仍給地價作為官田每畝上等五錢次等三錢如原係官荒田地冒免額糧冒領地價查出治罪

一墾荒佃戶除本地窮民外將蘇松常太等處力農之民無田可耕者地方官查明取結中送與本地佃民分派耕墾每戶給地五十畝牛一具籽種五石草房三間不許貪多廣種仍前革率惰悞以上謹擬各條乃臣所熟籌而未辦者如蒙 聖恩准行其需員經理分管督墾一切未盡事宜統聽督撫諸臣詳議請 旨遵行總期多墾一畝荒土即增一畝生計淮海地方自有起色蘇松無業之民得有恒產我 聖主應來不惜帑金廣開水利之殊恩至此亦愈收實效而觀全功矣

酌籌經理社救章程疏乾隆二十七年富明安

江西布政使臣富明安謹 奏為酌籌經理社穀之章程
以重倉貯事竊照社穀輸自民間接濟民食例設社長經
管不使假手胥役法至善也臣抵江西任後查核通省社
穀共有六十七萬六千餘石分貯各都各里設立正副各
社長掌管收放地方官稽其出入每歲造冊詳報皆循照
定例辦理惟是檢查業卷凡舉報社長有情願承充者有
不情願承充者推求其故緣端方之人恐辦理疎虞貽身
家之累而狡黠之徒又以充當社長為榮得遂操縱是社
長中之賢不肖原屬不一選擇雖極慎重而經營太久亦
難保不初終易轍况社穀散貯四鄉非若常平之存貯在
省者比侵漁掩飾若非新舊更易難以得其底蘊查雍正
二年九卿彙議社穀業內既定有五年十年分別獎勵之
條江省現在更換社長或久或近並無一定年限辦理總

未盡一臣愚見請將社長悉定限一年更換凡春借秋還後即令交代盤查取結通報存案選擇殷實誠謹之人輪充周而復始一歲之內有一番更代如有侵挪虛控自必立時敗露便於著落追賠至社穀一項既入州縣交代社長自應責令稽查向無處分定例每多膜視嗣後州縣稽查社穀請比照府州稽察州縣倉穀之例如有虧空失察徇隱即著落分賠如此立定章程自必交相警惕捐輸社穀顆粒皆為實貯收放悉屬公平於民食倉貯均有裨益臣管見所及是否有當伏乞 皇上睿鑒訓示

訊世襲遞降疏乾隆二十七年

紀復亨

陝西道監察御史臣紀復亨謹 奏為敬抒末議仰祈

聖鑒事竊惟爵賞為名器之大防而世襲尤軍功之鉅

典我

皇上聖武布昭

天成遐震建千百世無窮

之偉烈擴二萬里有截之巖疆

大武慶成賞延及世

凡効力行間者皆由在事大臣等據實開報及經

聖

鑒親定等差藏在司勳永無致法至慎而典至渥也惟

是我 朝定鼎之初削平閩粵戡定滇黔當日鼓勵戎行

錫爵特從其厚是以緣營將校每一叙功無不人膺懋賞

而各省之中閩省尤多因其先有海寇之投誠其後有臺

灣兩次之克捷市井之徒操舟之卒會逢其適皆得爵分

右職庇及後人蓋已百數十年於茲矣臣惟前此大攻克

捷皆有總理軍務之大員此等人員不過偏裨効力與夫

勢威投誠并有僅帶功加虛銜而未膺戎閫者迨一經議

叙優予世職其人既榮寵終身而子若孫襲替後對品補

用武職即可至副參等缺彼行伍出身者非著勤勞不能

拔擢而紕袴無賴之徒往往唾手而得以故冒濫不已奸

偽滋生如現在督臣楊廷璋等獲鄒文等假劄及林承武等以市僧細民而賄買頂冒其明驗也臣思屬近天

潢襲封亦從遞降此等世職人員竟與帶礪之盟並垂奕

禩竊謂處之太優即國家酬庸之典念其先世少有勤

勞然自祖父延及孫曾則待之者亦不為不厚至日久相

沿官司之冊檔彌繁氓庶之誥系難據以致奸宄誘張敢為販鬻螟蛉假借謬託宗支襲名器而墜法紀莫此為甚

臣請 皇上勅下廷議嗣後凡係綠營軍功人員核其

何項功勳准予世職次數其子孫承襲應作何遞降分別等差著為定例其從前得過世職人員請通查各省核其所得功勳及襲過世次並現在應行承襲之子孫是否嫡派或有世絕無可繼嗣應行削除者轉飭地方官詳細造冊取具宗圖印甘各結咨送兵部嚴查底檔彙合具奏請

旨定奪再現今由世職補授將弁者各省甚多雖皆由督撫保題而果否係世職的裔有無影射頂冒等弊正當乘此清釐或恐畏法不吐並懇准其自首如何處置恭候 聖裁 臣因閩省奸民現有犯業敬抒末議是否可

採伏乞

睿鑒

請嚴鄉飲濫舉並定服色疏

乾隆二十

李因培

內閣學士提督浙江學政 臣李因培謹 奏為請嚴鄉飲之濫舉並明定服色以杜僭越事竊照鄉飲酒禮乃古者黨正以禮屬民而飲酒於序以正齒位之遺典至重也查律令及學政全書所載序長幼論賢良別奸頑高年有德者居上高年淳篤者並之以次序齒而列其有違條犯法者不許于與良善之席法至嚴也乃各省繁劇地方視為不急之務數十年間並不舉行而一二偏僻小縣每歲兩

舉每舉數人其大賓一席或以無人而缺至於贊賓衆賓之屬或係生監或係耆民所開事實多係依樣葫蘆地方不復討察稟即轉詳其中年老淳謹者固多而曾經犯案或健訟久著或素行鄙畷家資溫飽者亦得廁身其列迨既與賓筵之後即有告發而原舉之地方官往往回護苟避叅處不復執法此等素贖時時有之其弊由生員教官徇情濫舉亦由該地方有司任人蒙蔽故也至於賓筵服色在生員自有本分頂帶在耆民亦應各守常分乃臣所到之處見有金頂補服年老之人詢之則皆歷年飲賓所服皆八九品服色細加採訪各處皆同不獨尋常服用即鄉飲之日已然臣竊以為僭矣夫儀禮所載明日賓鄉服以拜賜鄭康成注鄉服昨日與鄉大夫飲酒之朝服也其賓而朝服者儀禮之鄉飲酒乃鄉大夫三年大比獻賢能

而禮賓之即今賓興之意所謂賓乃士也士貢於朝將以
官之故得同服朝服今鄉飲乃正齒位之禮賓既屬民不
得僭越明矣且思事屬古禮固不可廢然舉之不嫌慎重
而昭物用別等威亦宜明定章程示不可越應請嗣後鄉
飲各賓仍由生員具呈該州縣印官先於現存案卷內查
其從前有無犯案傳到該族隣詢明平素有無過舉及內
行不修當堂取結其不堪者即行批銷果無不合然後牒
學開造事實照例通詳倘不得其人宜缺勿濫其從前舉
過飲賓內如有過犯原係學官查出審定據實詳報者從
寬免其參處惟後任官查出前任所濫舉乃照例參處濫
舉之生員仍照律治罪至飲賓分別生監者民應用何等
服色之處仰懇 皇上勅部定議明立章程通行遵照
庶典禮明而章服有等於風化不無少裨矣

皇清奏議卷五十四

請杜大臣言利之漸以重國體疏 乾隆二十八年

葉啟豐

掌浙江道監察御史 臣葉啟豐謹 奏為請杜大臣言利
之漸以重 國體事竊思督撫身任封疆重寄保境安民
興廢舉廢其間籌畫動支務思大體不得巧稱酌劑致開
科歛之端前因廣東總督蘇昌奏請撥解粵東稅契銀一
百七十餘萬併圍基堤岸鹽羨生息銀二十九萬餘兩浙
江巡撫熊學鵬亦有請將高捐解差餘存銀兩解交內府
之奏欽奉 諭旨訓飭恐各省督撫未能盡喻著通行
傳諭知之欽此仰見我 皇上如天睿照至公至大之
聖心臣聞却抄竊照兩江總督尹繼善江蘇巡撫莊
有恭會奏酌籌修理下江通省城工一摺內稱江省城垣

例動匠費修理上江因匠費不敷有開捐勸捐之請現在
辦理甫有頭緒查下江未修城垣共三十餘座約需工料
銀八十餘萬應請仿照安省開捐之例又稱修城原以衛
民亦應自衛各屬地方豈無好義急公之人願出餘資共
勸善舉又稱查各州縣開設典當從前每年有資送地方
官當規近年悉行革除所省實多茲當興工各隨資本之
多寡分別捐輸衆擎易舉等語業蒙 勅部核議應飭

部臣查辦外伏思國家取民有制經費有常開捐一例或
因地方水旱凶災重大等情權為救時之計並非著為憲
典我 皇上軫念民依每遇大工大賑發帑捐租動經
鉅萬細核江省城工事非甚急計其所費亦滄海一粟耳
原不應有開捐之請况我 朝重熙累洽海宇乂安曠古
無比數十萬城工之費豈屑取給富戶仰其餘資倡勸捐

之議以為共勦善舉殊非政體乃該督等稱修城衛民亦應自衛查設官分職所以庇民城池為封守攸關隍壑繕修衛民正以衛國而乃稱應令自衛所奏實屬非經至於各州縣監當規禮既經禁革該督等奏請將當商近年所省規費分別捐輸以為衆擎易舉尤屬非體此項陋規在不肖州縣或有因公派收之事尚應立掛彈章今以城工之費一旦籌算及此是戒州縣之官貪而為督撫者反欲借以開利藪此誠何心且下江既援上江開捐勸捐之請則他省工程有似此應行興修者勢必輾轉援引踵事漸增伊于胡底似非全盛之世所宜有也再查勸捐事例准行樂輸者固皆實力急公而經手之州縣恐非盡實心潔已萬一因此居奇陽為勸導陰肆婪索假朝廷之德成肥私家之囊橐戶商等業已捐輸不敢控訴縱該督撫

精明留心查察且恐難以周知再或因新例初行稍存迴護其於吏治民生所關更鉅臣愚以為江省因城工開捐勸捐等款似不可行所有應修城工等項伏乞 皇上勅令該督撫等另行妥酌辦理庶他省不得援例以請且可杜言利者巧為覬覦之私矣

議濬復漳河故道疏 乾隆二十八年 方觀承

直隸總督臣方觀承謹 奏為漳河亟須濬復故道恭摺奏明情形仰祈 聖鑒事竊查漳河由河南臨漳縣入

直隸經廣平大名二府屬地方至山東館陶縣與衛河合乾隆二十六年秋汎於臨漳所屬之沙莊北岸漫溢下游成安廣平大名原城四縣數百村莊被水成災經臣題報蒙 恩賑恤嗣經臣與河南前任撫臣胡寶瑤各委道

府會勘由兩省藩司公議挑淤築壩使水歸故道比因漫

口在臨漳而為患仍在直境成安等四縣士民情願捐備
工料今臨漳士民亦出一段按五股均攤協力辦理工竣
並經臣移咨豫撫委員會同直隸汛員駐工防守上年入
夏以後水由正河已屬循軌因閏五月雨水連綿盛漲疊
至草壩被衝過溜臨漳境內羊羔村以上八里已刷有河
形過此則散漫於成安廣平大名元城各境內水至大名
復分五股旁溢於山東邱縣復入直隸之廣宗由鉅鹿歸
入寧晉泊內臣委永定河同知滿保前赴漫口詳加察看
前工祇因就正河淤處挑濬而建壩處所又稍覺兜灣水
勢下墜致被衝刷現在漫口溜走七分正河溜止三分今
應將河頭改上百餘丈使之迎溜得勢其下河身淤處挑
比漫口加深約長五百丈於河頭分流處堅築大壩長一
百八十丈高一丈截其北溢之路又於壩東接築土堤長

五百餘丈底寬六丈高一丈攔截河灘抵正河而止估需工料銀八千餘兩據該道府議稟此次不便復用民力大名道楊開鼎大名府姚之德廣平府周元理並所屬十七州縣情願公捐副用業於上冬購備物料臣於新正遴派永定河熟習樁埽弁兵三十二名前往關會豫省擇於開凍後興工趕辦三月內完竣尚不致有誤秋耕詎新任彰德府李訥臨漳縣張光熊忽生異論謂築壩則逆流倒灌不但臨漳城淹沒堪虞即附近村莊恐先歸於烏有惟有因其自然於下游廣大所屬多開支河引入大河等語具覆大名道轉稟到臣查臨漳縣逼近漳河其為患與否惟視河流之通塞與河莊漫口築壩全無關涉今築壩開淤使水歸正河一路則濁河不致分勢有水緩停沙之病兩省均有利益是以前工兩省合辦臨漳出夫直省給值工

完之後委員會同防汛官均無異議今不過將所挑河頭
移令迎溜所築之壩移近河頭與上次所辦並無二樣何
至利害頓殊輒相沮格蓋因該府縣皆非前此經辦之員
又見臨漳改溜處所已成河形水有約束遂固顧下游數
邑田廬淹浸直欲以隣為壑耳查正河經流一百數十里
現在深通所議挑河淤淤工作祇五百餘丈乃該府欲於
下游多開支河引入大河所稱支河惟元城義井村以下
十餘里悉係平田何能另開河道容納全漳語既乖謬至
其詳請咨商會勘意在遷延不辦以兩省公同勘定之事
何須另勘且連年被災之地豈容又誤秋田臣已飭交大
名道府督率辦理並恐彼處無知士民窺見府縣意指藉
端阻撓議於成安廣平附近村莊撥夫前往尅日興工一
面將下游元城館陶交界地方移會東省查有停淤一律

疏浚深通以暢尾閘之勢但事關隔省臨漳縣府皆係新任既存畛域之見又復不諳河務合無仰懇

皇上天

恩勅知新任河南撫臣葉存仁飭委原辦之河北道吳虎炳會同大名道楊開鼎悉心妥辦且並俟葉存仁赴任經過保定之時與之面論事宜一併飭屬遵照所有該處河壩情形理合繪圖貼說恭摺具

奏

酌籌蘇松太三屬疏濬事宜疏

乾隆十八年

莊有恭

江蘇巡撫臣莊有恭謹 奏為酌籌蘇松太三屬疏濬事

宜仰請 聖訓事竊臣在浙撫任時適上年秋雨稍多

風潮稍大湖水漲越二旬退不盈尺親赴嘉湖一帶察勘知由水歸太湖之路不暢並疑下游歸江歸海之路亦或有壅閘曾遣浙員來江查勘究以事在隔省難得確切因先將浙省通湖漕港必如何大加開濬不致積水難消飭

司府等書議詳曾紀恭摺 奏明正議舉行且又蒙

恩命調撫江蘇經浙閩督臣楊廷璋撫臣熊學鵬用臣

前議請將湖州府屬之七十二澗酌用民力以時疏濬奉

旨允行並於摺內聲明江南之太湖出水之處有無

淤塞應否疏濬咨臣查明行辨且自上冬交事即為博訪

周詢并遴委留江效用原任知縣張世受等遍歷蘇松太

各屬確勘由湖歸江由江歸海之路窮源竟委循幹達支

將何處壅闕應與開寬何處淤淺應加深濬並為酌估需

費茲據陸續繪圖摺前來臣綜覽全局竊見太湖居蘇

常湖三郡北受荆瀘南受天目諸山之水匯為巨浸而分

派之大幹則以三江為要三江者吳淞江婁江東江也東

江自宋已湮建明永樂開闢黃浦江寬濶深通足當三江

經吳江震澤吳縣元和崑山新陽青浦華亭上海太倉鎮

洋嘉定十二州縣之境其間港浦縱橫湖蕩錯雜大抵觀之無處不可通疏無地不可分洩亦可安於無事然百節之通不勝一節之塞救港之洩不及一港之壅則其勢必有所阻壅太湖出水之口不特寶帶橋一處如吳江之十八港十七橋吳縣之鮎魚口大缺口為湖水穿運入江之要道亦無不淺阻又如入吳淞之龐山湖大斜港九里湖澱山湖叙浦等處向稱寬闊深通大資宣洩邇來民間貪圖小利遍植菱蓮圍築魚蕩亦多侵佔臣本年正月因查勘松江海蕩親至劉河窺見現在河形大非昔比舟楫來往必艱舟待潮崑山外濠為吳江正道狹特甚蘇州之婁門外河為江原出運咽喉河面僅寬三四丈不等平時無事雖無關礙偶遇秋霖四水滙入江身淺窄先為本境之水所佔必俟境水稍退然後河水得出而上淤已多所

淹矣東南財賦重地水利民生大計急宜早治今日籌所以治水之法其運河以西太湖出水之口但就其有港可通之處為之清塋佔塞規仿田額務使分流得以迅速但其運河以東三江故道除黃浦為浙西水口現在尚屬深通但於泖口挑除新漲蘆墩三處足資暢洩無庸大辨外其吳淞江自龐山湖以下婁江自婁門以下凡有淺狹阻滯處所疏浚寬深務於上源所洩之數足相容納其江身中段一切植蘆插蘆及冒佔水面之道查明盡數剷除嗣後仍嚴為禁止其有去海太近建置非宜難於啟閉者另為酌量改移務令啟閉得宜足資宣洩而海口之淤亦將分批而自去凡所應辦之工日與司道再三籌酌業已粗具規條第工段較長約畧估計所需雖覺浩繁然散在十

二川縣通力合作亦所出無多此本為田疇起見如與舉

有成無論業佃皆得永利賴民間聞有此舉皆樂於趨
事願以民力為之但用民之力慎選董事分段督修仍需
官為督率若待鳩集財用而後興工不無稍稽時日合無
仰懇 皇上天恩准於公項內先行借動酌籌辦理於

蘇松太三屬得沾宣洩灌溉州縣分年按款照數徵還則
民力可紓大工可期速集如蒙 恩允 臣當親與道府

大員再加覆勘估需數目立定章程另行具 奏並即於
今冬漕務事竣以次興工務於二三月通工蒞事則東南
億兆咸感沐 皇仁無既矣

陳河工辦料章程疏 乾隆二十八年 高 晉

江南河道總督日高晉謹 奏為敬陳河工辦理章程仰
祈 聖鑒事竊惟河工以修防為要修防以物料為先
向來南河辦料有林檉葦柴二項先期動帑交各廳採辦

以備次年修防之用而料有文州縣分辦者五月發辦
之料名為鹽河上游七八月發辦之料名為頭關九十月
發辦之料名為二關至物料交工有限十月完半歲內全
完者有限十一月完半次年正月全完者更有限正月完
半三月始行全完者款項名目既參差不一到工亦遲速
不齊舊料未清復領新帑料未到齊即以開工致貯工料
物挪新掩舊拉後扯前牽混糾纏最易滋弊臣仰蒙

皇上天恩畀以河防重任事事凜遵

聖訓時時留心

整頓伏思河防惟緊要大工需用物料必俟臨期酌量購
辦難以預為計定若夫各廳歲修工程所需物料惟鹽河
上游頭關二關之分其實同一購柴並無區別與其分立
名目多定期限期致滋牽混之弊何若隨時發銀早為採辦
統限年底到工一概稱為購料不但事歸簡易便於稽查

而各廳冬收料物春做工程亦可杜其弊混。臣於上年各廳州縣領辦物料時，即督同揚徐二道嚴定章程，按限查催，不拘何項料物，統限十二月底全數運工報查。並於霜降後水落歸槽兩岸工程底裏畢露之時，專委各道參游分投前往各廳，將凡有應修之處，逐細核查，分別先後緩急，多寡預為估計冊造核定。臣於各廳料物到齊之後，又復親往周歷稽查原估未妥之工，立即更正，並將一切舊存新辦正雜各料按數點驗抽堆盤支，不使稍有短少。牽混今工，俱估定料物齊全。次第興修工程，可期堅固。將來大汛屆臨，亦得專心防守於河務，甚有裨益。惟是河工積習相沿已久，若不奏請著為定例，仍恐因循觀望。臣請嗣後河工每年歲搶修辦料，統於夏秋核明各廳工程之險易需料多寡，酌定銀數，葦柴於四五月間發辦。林樁於七

八月間發辦俱名為購料所有向來相沿鹽河上游頭關
二關名色悉行冊除其交工限期均限十二月底全數到
齊貯工概不准展限如逾限不完即將冰辦之該廳州縣
照降三級調用之例嚴行叅處該管道府罰俸一年仍將
未完料物查明如果實欠在民在蕩著落接任之員押令
叅員催追完報倘有侵挪虧空等事即照虧空錢糧例嚴
叅治罪如此督催之道府辦料之各員咸知遵守而名目
既已畫一料可依限到工一切挪新掩舊等弊皆可盡除
矣臣知識淺陋是否有當相應恭摺具 奏

請涼莊移兵酌留疏 乾隆二十八年

楊應琚

涼莊將軍臣巴祿映甘總督臣楊應琚謹 奏為據實密
奏仰祈 聖鑒事竊臣等接准 廷議令將涼莊滿洲
蒙古兵丁三千三百名携眷移駐伊犁等因除現在將移

駐各項事宜詳議條款另摺奏請

訓示外臣等伏查

伊犁地方田土沃腴水草豐美兵丁遷移至彼既於生計有裨且有行圍打牲地方堪以操練技藝洵為馭遠強兵之盛舉是以臣已祿於宣布

諭旨之時官兵靡不踴

躍惟是料理遷移需費繁重凡移往兵丁必須人悉精強斯於地方有益而錢糧亦歸實用今查涼莊滿洲蒙古兵丁自移駐以來幾及三十年其中有年老殘疾家無次丁頂補不得不仍留錢糧養生者更有兩代或一代寡居家無成丁不得不將幼子挑補甲缺以資養贍者此等甲兵現在涼莊雖於營伍未有實益而國家曠典念係滿洲世僕是以優給錢糧養贍今若一併移駐伊犁亦仍須仰賴國家奉養而自涼莊至彼程途遙遠轉須多糜帑項料理資送未免重複滋費且此外尚有本身雖強壯而

父母年老殘廢難以長途携同移駐者凡此數項俱係實情臣等身任其地既悉此情形敢不仰體 聖懷悉心

詳籌期於妥協竊思此等老疾孤寡幼推之戶移往伊犁既無實用莫若酌量存留以節遷移之繁費且各該兵丁自蒙 皇上特恩遇有病故准其在外埋葬並為無力

之人動項置地營葬以來伊等率皆立有墳墓難以動移又不忍拋棄若酌留有人則凡移往伊犁官兵亦可將墳墓轉託照料更必心無牽挂果於前往實於公私交有裨益且等公同詳細商酌應請將應移涼莊甲兵三千二百餘名之內查有別項年老殘廢孤寡幼推之戶酌留五百名統歸於涼州駐劄並於每兵額設馬匹內裁去二匹以省供之並照山東海州駐防設立城守尉歸青州副都統管轄之例將協領改設城守尉一員其餘應需官員按照

營制酌留就近歸寧夏將軍統轄如此庶移駐之兵悉皆
精銳既足以壯新疆之營伍而 帑項亦不致虛糜臣等
愚見如斯是否可行出自 聖裁非臣等所敢擅使

議移駐滿洲蒙古兵事宜疏

乾隆二十八年

楊應琚

涼莊將軍臣巴祿陝甘總督日揚應琚謹 奏為遵

旨會同詳議具奏事臣等竊惟我 皇上自奠定新疆

以來一統宏無外之規萬年協大同之治自巴里坤以迄
伊犁等處俱成內地允宜選移精銳以照寄重股肱茲蒙

聖主為兵丁營樂利之謀為疆域永苞桑之固令將
涼莊滿洲蒙古兵携眷移駐伊犁俾得熟習技藝俱成勁
旅仰見 睿謨宏遠 恩鑒周詳臣巴祿於接准

廷議之後即俾集官兵宣布曉諭一面 奏明於正月二

十五日自涼州起程於二月初七日至肅州將一切應辦

事宜會同臣楊應琨悉心籌酌伏查涼莊現駐滿洲蒙古官兵三千三百餘員名係由西安移往駐防迄今幾及三十年仰蒙

深恩奉養其丁口滋生日盛計本身連家口共一萬七千餘名口今既定議移駐伊犁道路遙遠家口繁重凡製辦行裝與沿途應需車馬盤費等項自應按照定例參以旗兵現在情形詳細妥籌俾官兵長途不致拮据而於帑項又得捋節臣等謹酌議條款恭呈

聖鑒

一應需俸賞查向例官兵派撥出口俱給與俸賞銀兩以資製裝之用上年派撥察哈爾兵一千名連家口發往伊犁駐劄經軍機大臣奏准官員賞給一年俸銀兵丁照換防索倫兵每名賞銀二十兩之例酌量稍為加增將製裝銀各加十兩賞給伊等妻子伊等本身仍各賞銀二十兩

在案今涼莊滿洲蒙古官兵携眷移駐伊犁事同一例應請即照前例官員各按品賞給一年俸銀兵丁每名本身賞給二十兩外加十兩賞給伊等妻子共賞銀三十兩至官兵跟役並請照例每名賞銀二兩以資製辦行裝

一應需馬匹車輛查官員向俱設有本身例馬馬兵亦有額設本身自立馬匹今移駐伊犁應令官兵本身及跟役俱以原設馬匹乘騎毋庸另議外惟步兵並無馬匹請照例自涼莊至哈密每二名連跟役給車一輛其自哈密至伊犁應需換給馬匹之處查本年臣楊應琚會同尚書臣永貴覆奏緝營兵丁換班事宜案內酌請兵丁自哈密至防所應需馱載駝隻折給借銀聽其自備俟到防後分別道路遠近將路遠之庫車以西及伊犁繳還十分之三分作二年坐扣庫車以東各處減半扣繳分作三年完項在

業今前項步兵自哈密至伊犁酌請每名給馬一匹即照前例每匹照依定價折給銀八兩無論馬匹驃驢聽其自行購備其跟役脚力無庸另行論及俟至伊犁仍令繳還十分之三分作二年坐扣庶辦理較為簡便至官兵眷口內多婦女幼稚必需給與車輛乘坐查上年安西提標前營二營官兵携眷移駐烏魯木齊業內其眷口無論人口大小每三名給車一輛今前項官兵所携眷口自涼莊至伊犁亦請無論大小口每三名給車一輛惟是滿營官兵所帶行李鍋帳較多迥非綠營情形可比今雖照例給車乘坐其一切行裝實慮難以携帶酌請每戶再量為添給車一輛俾得裝載行李鍋帳等項以示優恤

一應需盤費查上年安西提標移駐烏魯木齊官兵眷口係照從前內地移駐安西兵丁搬眷之例每百里每大口

給盤費銀一錢二分小口六分今涼莊滿營官兵移駐伊犁其眷口所需盤費應照前例支給至官員本身仍照例按品級支給鹽菜銀兩並照應帶跟役名數每名月支鹽菜銀五錢兵丁本身月支鹽菜銀一兩五錢其兵丁所帶跟役因係全家搬移其中或有一兵跟役至二三名者雖不便按名支給鹽菜銀兩若查照向例每名二名合給跟役一名實屬不敷酌請每兵一名無論所帶跟役多寡止准量給一名月支鹽菜銀五錢其官兵暨跟役仍每名各日支口糧八合三勺至官兵所帶跟役現既議給鹽菜口糧不應復請支給盤費致滋重複

一應需鍋帳查哈密迤西各站並無旗舍官兵暨眷口至彼之後沿途住宿鍋帳在所必需查上年察哈爾移駐伊犁兵丁經軍機大臣奏准每戶給帳房一頂折給銀四兩

鍋一口折給銀二兩在案今前項兵丁携眷移駐伊犁應請照例一體折給鍋帳銀兩令其自行製備其官員應需鍋帳亦請照例按品折給以資住宿

一經行道路查前項官兵携眷移駐伊犁業經 臣議俟明歲起作為三起每年移駐一起自應遵照辦理其應由何路行走之處查自巴里坤以至西烏魯木齊尚未設有臺站現在新疆往回官兵俱由闐展一帶經行今前項官兵自涼莊起程行抵哈密之後亦即由闐展烏魯木齊臺路前赴伊犁沿途便於照料以上各條臣等再四詳細面同商酌意見會同謹合詞恭摺具 奏伏祈 皇上睿鑒 勅議施行

議散補漢軍兵事宜疏 乾隆二十八年 楊應琚

涼莊將軍臣巴祿陝甘總督臣楊應琚謹 奏為遵

旨會同詳議具奏事乾隆二十八年正月十七日承准

廷議內開查現今涼莊駐防滿洲蒙古兵移駐伊犁其餘漢軍兵一千即不成部伍漢軍既有出旗為民之例請飭交該將軍總督或令出旗為民或調補綠營俱聽其自便奉 旨依議臣巴祿臣楊應琚悉心籌酌除滿洲蒙古兵携眷移駐伊犁之處現已詳議條款另摺具 奏外伏查涼莊現駐漢軍兵丁係同滿洲蒙古兵丁俱由西安移往駐防今計現任協領以下驍騎校以上並候記名休致等官共三十六員領催三十八名馬兵六百二十七名砲手十七名匹役頭目二名匹役二十二名步兵二百六十八名養役兵三十二名共計兵糧一千六名蓋自經移駐以來幾及三十年滋生較前繁盛仰蒙 恩旨令其出旗為民或調補綠營糧缺聽其自便臣楊應琚前在兩廣

閩浙任內查辦漢軍出旗業經辦有成效今與臣巴祿即行仿照閩廣已定章程詳細參酌臚列條款恭呈 聖

鑒訓示

一散處為民之戶應今定其所往省分給與印票也查漢軍官兵內如有情願散處為民之人應准其呈明所往省分州縣令涼莊地方官照例給予鈐印手票交所往之處編入民籍與戶民一體考試婚配立業謀生仍將為民戶口造冊咨明部旗以備查考

一調補綠營兵應在附近營分酌補也查漢軍兵丁內如有情願調補綠營糧缺之人自應於附近營伍內遇有兵糧缺出分缺挨次輪補俾該兵不至在旗日久守候而於綠營民兵餘丁挑補之路亦無妨礙始為妥協今臣等查得甘撫標陝甘二提標及陝提屬之靖遠協與寧夏涼州

西寧肅州河州等五鎮暨所屬各營俱坐落甘省境內凡有願調綠營之人均可就近調補如該兵在旗原係領催馬甲並有馬之匹役頭目俱令改補馬糧若原係步兵匹兵養育兵俱令改補步糧並查陝甘二提涼肅二鎮經前督臣吳達善奏准改為馬六步四如遇馬糧缺出陸續相間裁汰改募步兵等因今應將此等裁馬改步營分遇有馬糧缺出酌擬以四缺為一班第一缺坐補軍營著有勞績移咨拔補之步守兵丁第二缺裁汰改步第三缺補放出旗馬甲第四缺拔補存城步兵其並無應裁馬缺營分遇有馬糧缺出以三缺為一班第一缺坐補軍營步兵丁第二缺補放出旗馬甲第三缺拔補存城步兵至陝甘二提標並無守兵遇有步糧缺出應以二缺為一班第一缺補放出旗步兵第二缺拔補軍營及存城病故兵丁子

弟其餘有守糧各營分遇步糧缺出應以三缺為一班第一缺坐補軍營守兵第二缺補放出旗步甲第三缺拔補存城守兵及病故兵丁子弟如軍營移咨坐補存城守兵及病故兵丁子弟均週而復始挨次拔補以示均平仍將此等調補綠營之戶亦令地方官給與鈐印手票並造冊咨明部旗存案其子弟食糧應試婚配悉照散處為民之戶一體辦理

一請酌給賞項以廣 皇仁也查閩廣奏准漢軍調補綠營如綠營原有兵房者每兵賞搬移銀二兩無兵房者賞賃房銀六兩其搬移他往之窮苦閑散戶口每戶賞資本銀八兩又閩省奏准調補外標營之甲兵除搬移賃屋銀兩仍照原議分別賞給外其家口按其多寡每名口每百里陸路酌給銀三錢各在案今涼莊調補綠營甲兵並

窮苦閑散戶口均請照此分別給賞至如涼州甲兵調補涼州鎮標登城守營以及莊浪兵調補莊浪營均無需路費止分別賞給搬賃屋銀兩其調補外標營者則程途較遠携眷前往需費即多請照例除分別賞給搬移賃屋銀兩外仍按其家口多寡每名口每百里酌給銀三錢以資脚力路費至此項銀兩並請在司庫內不拘何項先行給發將來出旗截贖項下撥還歸款

一請給還馬匹以示優恤也查閩廣出旗甲兵每兵自立馬三匹業經奏蒙 聖恩准其領回在案今涼州事同

一例應請一體 加恩給予領回俾遷移不至拮据益必永矢銜結

一出旗官員酌請分別改補也查閩省出旗章程現任官員自防禦以上送部引 見候 旨另補曉騎校無

庸送部即以綠營千總改補筆帖式情願改武者考驗弓馬以綠營千總記總補用清字外郎已滿八年與筆帖式由清字外郎考取歷俸已滿八年者均咨部以縣丞補用又粵省候補筆帖式並記名領催均以綠營經制外委補用各在案今涼莊出旗官員亦請照依此例分別辦理俾得乘時効用再查乾隆八年定例漢軍改隸民籍世職准其帶往歸入漢人班次補用其進士舉人生監及候補候選降調官員並捐納職銜人員應照伊等職銜與漢人一體考試錄用等語今涼州出旗人戶內應請查明現有職銜照例一體辦理此內如原任降調副都統仍帶騎都尉世職陳世泰係由大員降調應如何錄用容臣已稟給咨送部引 見恭候 欽定以上各條臣等再四商酌意見僉同謹合詞恭 奏伏乞 皇上睿鑒 勅議

施行

陳賑務情形疏 乾隆二十八年

朱績經

巡視天津漕務御史臣朱績經謹 奏為敬陳賑務情形
畧抒一得仰祈 聖鑒事竊臣巡視天津漕務目覩地
方官辦理賑濟事宜有可酌改之處並應格外周恤者敬
為我 皇上陳之

一碾米放賑宜防滋弊也查被災州縣有存倉米石及撥
給漕米者率用米賑濟其距水次稍遠地方一時撥運未
到即將現貯倉穀給放地方官向皆將穀發交鋪戶每穀
一斗繳米五升五合以五升作報銷五合糶解充公鋪戶
多以粗米交官州縣查察少疎即被欺朦是以貧民所領
碾米穀色遠遜漕米且以穀碾米州縣之收發鋪戶之領
納節次煩擾管倉人役保無串通舞弊等事臣愚以為碾

穀放賑之各州縣其未發之穀請以穀折米如應給五升者准給穀几升酌扣穀一升充公貧民領穀聽其自行碾米比之官碾較為實惠兼糠粃並濟食用於災黎更有小補

一酌借籽種請通融周恤也查上年被水地畝現今涸出者遵奉 恩旨分別借給籽種近聞瀆水之區有乾涸在前民間先已播種春麥萌芽未發突遇暴風激浪致被浸損者此等地畝地方官拘泥成例以曾經具報種麥在先不在此次具報周恤之例第實救之餘民力正困請地方官查明實在無力地戶一體酌借籽種於水退時督率補種以冀有秋

一貧民留養局請隨地兼收外來流移一例量加恩撫也查被水地方外出貧民故鄉既無常產資送更無實際蒙

聖明洞鑒周恤民隱在籍者查邀賑恤外出者聽謀生理矣但流民所至地方例無給賑雖公所粥廠皆可就食而老弱無依窮途不能自存者亦有之伏查直省州縣皆有留食局原為貧病無依之人設立其現在奉行若一縣設有數處收養百人至二百餘人不等但各地方辦理不一或有希圖節省少事外來流民不肯收留又因時屆春融多議停止應請勅下督撫通行有司不得拘於成見查有入境流民老弱病困無計謀食者一面據實具報即准入局留養與現在收養之人量行展限俟四月麥秋後聽其隨便傭趁再議停止倘經費不敷准酌量動支公項歸於展賑案內報銷其先在他方暨後聞賑歸來之民亦令本籍州縣實戶口增入冊內俾得均霑 聖澤沿途得所依托歸里又有資生似亦安插流民之一法以

上三條臣自到津後就近體訪謹就所見情形陳其愚昧
是否可採伏乞 皇上聖鑒

請除賑災通糶疏 乾隆二十八年 顧光旭

浙江道監察御史臣顧光旭謹 奏為請除辦災之通糶
以責實效事竊照直隸山東上年偶被偏災荷蒙 聖

恩軫念民依先後截漕發帑加賑再賑叠沛 恩膏仰
見我 皇上如天之仁惠愛元元之意無微不至近見

鄉村流戶扶老挈幼紛紛至京入春以來尤多故五城米
廠及飯廠內人數較去冬有加詢其由來皆近京數百里
內逃荒就食之人臣因訪聞京外被災各州縣居民相率
流徙或毀屋伐樹鬻賣男女不可勝計饑羸老弱困阨道
路纍纍不絕即聞見之所及如此則餘外各州縣情形可
知伏思救荒無奇策惟在督撫大吏及有司親民之官皆

以全副精神赴之方克有濟乃各州縣未嘗不設廠散賑未嘗不分別加賑而或委任於佐貳假手於吏胥所設之廠又或遠離村鎮四鄉窮民奔走待食等候無時因之殞斃者皆所不免是 國家良法美意一入俗吏之手而民之得沾實惠者什不及五且各州縣既不實力辦荒即有一二賢能有司能撫循其境內而四達流民間風畢集屯聚日多轉令賢者亦難於措手此則該督撫無真實愛民之心貫注於下而其下應付塞責一切設施皆具文也方今春和已至農事將興而災民正及青黃不接之時業蒙 恩旨於停賑之後概予加賑一月 臣請 勅下該督撫加意撫綏土著隨地安集流民務令各遂生謀去年被淹之地積水未盡消涸急宜設法宣洩強壯者既可以工代賑老弱者毋致失所然後照例借給牛具籽種以資

耕作則農登有兆而民氣可復倘仍前因陋就簡虛應故事農有散亡之憂地有不耕之產即當重治該督撫之罪至現在京城外來流民仰賴 聖主鴻慈已得赴厥領賑但小民一年之計專賴東作其有無力回籍者或應查照成例咨送其有本籍全無依靠不能回籍者或歸入大宛二縣加賑案內一體給賑宜作何安輯不致棲流無著之處伏乞 皇上勅下順天府尹會同五城御史查明人數造具清冊妥議具奏仰 臣更有請者外省遇水旱偏災大員親臨查勘州縣官先以伺候供應為急其所委佐貳微員或更滋擾累無益救荒昔朱子提刑浙中查勘災荒深山窮谷無所不到而單車所至吏民不知詢為查荒良法請嗣後大員親臨災地州縣不必供應亦不得輒委佐雜等官以致滋弊倘有絲毫騷擾該督撫即嚴叅重處

似於荒政亦不為無益也

皇清奏議卷五十四

皇清奏議卷五十五

奏禁江西祠宇流弊疏 乾隆二十九年輔德

江西巡撫兼提督銜臣輔德謹 奏為查禁祠宇流弊滌
訟源以維風教事竊照江西民情健訟有司勤惰不齊州
縣自理詞訟及上司批查案件多不遵照例限審結且有
判斷失平不能折服其心未免益長刁風而滋拖累臣到
任以來逐一清查分飭司道府州勒限出結秉公核正塵
積案件大半清釐其疲緩濶茸之員且即分別記過叅革
俾眾知儆惟查各屬訟案繁多之故緣江西民人有合族
建祠之習本籍城鄉暨其郡郭並省會地方但係同府同
省之同姓即糾歛金錢修建祠堂率皆棟宇輝煌規模宏
敞其用餘銀兩置產收租因而不肖之徒從中覬覦每以
風影之事妄啟訟端藉稱合族公事開銷祠費縣訟不勝

即赴府翻府審批結又赴省控何處控訴即住何處祠堂
即用何處祠費用竣復按戶派出私財任意侵用是祠堂
有費實為健訟之資同姓立祠竟為聚訟之地欲弭訟端
不得不清其源而塞其流也臣查民間祠堂如係建於本
鄉時祭饗而聯絡族誼設公費以教養子弟乃係敦尚古
道實為美俗可封若遠於府省地方祭饗無聞族誼不泯
其屋宇則傍宿健之徒其公財則積為逞訟之費類風敗
習莫此為甚况查所建府省祠堂大率皆推原遠年君王
將相一人共為始祖如周姓則祖后稷吳姓則祖泰伯姜
姓則祖姜尚袁姓則祖袁紹有祠必有譜其纂輯宗譜荒
唐悖謬亦復如之凡屬同府同姓者皆得出費與祠送其
支祖牌位於總龕之內列名於宗譜之冊每祠牌位動以
千百計源流支派無所擇出錢者聯秦越為一家不出錢

者置親支於局外原其創建之初不過一二好事之徒特
端建議希圖經手侵漁訪其同府同省同姓或聯絡於生
童應考之時或徧走於農民收割之後百計勸捐多方聳
動愚民溺於習俗樂於輸助故其費日集而多其風日踵
而盛初成廣厦置之空間歌訟聚賭窩匪藏奸不可究詰
近於省會祠中復經拿獲私鑄素犯臣查禮稱大夫不得
祖諸侯豈有民人而可妄祖前代之君相據禮已宜查禁
况濫錫至為聚訟之數甚而窩賭窩匪無所不有尤難聽
其流弊無所底止臣現今通飭各屬查明果係該縣土著
實有近祖可考歲行祭祀者仍准其存留外其餘荒遠不
經之始祖既係附會神亦不享非類應將牌位查燬譜並
削正其外府州縣奉附之支祖舍其本籍裡祀寄主府省
竟作餒而之鬼為其子孫者當亦難安應將牌位撤回至

其廢祠房間若不隨時剷跡日久保無復立應令改作平房鋪面不准本姓棍徒阻撓或竇有願留為該姓應試生童公廨尚屬可行倘准留之後仍有訟棍盤踞及窩賭窩匪情事除嚴拏本犯治罪外即將其屋宇入官或作堆舖或給未建衙署之員弁居住此外尚有一種本省外省各姓公宇雖未供設牌位名似稍異而實則相同應亦照此一律辦理嗣後永遠不許添建府省祠堂公宇其有實係敦本支而睦宗族者祇許於本鄉本村以時饗祀庶幾禮教可明訟源可涸而民生日厚矣

覆奏查辦江西祠譜疏 乾隆二十九年 輔 德

江西巡撫兼提督銜臣輔德謹 奏為查辦祠譜完竣恭摺覆奏事竊臣前奏江西民人妄隲姓氏釀金叛立公祠構訟種種流弊應行查辦緣由一摺仰蒙 諭旨特頒

一體禁治更尙 訓示諄諄毋得僅以文告奉行故事

臣惟有敬謹欽遵實力查辦當將欽奉 諭旨緣由編

行出示曉諭一面通行閩省州縣各令在於境內逐一詳查並為愷切曉諭俾知異族合祠擅起訟端妄祖君相在家在國均干罪謫今蒙 聖主恩加格外免其深求已

為該族大幸若再遷延隱匿則按法論擬定不可違並恐州縣視為具文不時查催指斥責令該管知府就近嚴督妥辦臣復細加體察緣江省各屬在在有祠由來甚久其中同宗嫡屬建於本籍鄉城者尚為尊祖敬宗而收其族此意未嘗不善而流弊之壞則由於同姓建祠而起今查同姓之祠雖不能追其所歸大概由單姓寒門欲矜望族或訟棍奸徒就中漁利因而由城及鄉由府及省處處邀約歛費創立公祠隨窳附華胄冒認名裔而不肖之輩爭

相倣效遂至不一而足至建祠餘貲或置田產或貯錢穀多有借與同姓愚民倚祠加利盤剝租息積於無用於是因其有費可動宗祠可居動輒興訟既肆其強梁復恣其饕餮獄訟繁興奸匪蔽聚實由於此其荒遠不經之木主則由各送木主入祠多係各家之祖乃復近溯古初得姓之始及攀援往代有名之人以為公共之始祖而各族專祠因亦轉相效尤非刊立木主即載入譜首以為榮耀其有近祖可考者反置之於不論是以各譜世系尚多接續可考獨其始祖則遙遙不相涉蓋本係從後妄行擬入者也今飭查其木主並吊驗族譜其祖及唐宋者已為近代而兩漢以上唐虞三代顛項軒轅稱為始祖者比比皆是甚有祖及盤古地皇者又有古之姦逆人所不齒如董卓朱溫之類尚為祖宗者更有正史不載僅見於稗官野史

實無其人如雷震子之類者亦皆奉為始祖其借越荒唐鄙俚悖謬實為已極且不料江西文物之地而於祖祠根本一事遂至於此今據各屬開摺具稟前來臣彙總查核計同姓共建者八十九祠一族獨建者八十九百九十四祠祠有荒遠不經之木主者一百七十祠譜載荒遠不經之始祖者一千一十六姓又公宇一百四十一處業將同姓共建祠內所立木主概令各自撤燬所置田產及其祠屋均令自行覓售將價各自分回間有別無售主者聽其歸於一族或改民房鋪面或作考試廡所及堆貯貨物之用總使根株悉絕不致復萌故習公宇亦照此辦理其荒遠不經之木主及圖像匾聯悉行撤燬所有譜首譜序荒遠不經之始祖及字樣名目一概剝削並毀其板斷以始遷該地及世系分明者為始祖均令另行改正送官鈐印

發運遇有爭訟飭以印譜為憑並據各屬稟稱當傳該族面諭時將其借妄荒唐之處逐一指明曉事者皆知悚懼惶愧且有將譜自行削正送印者足見人心之明原屬不昧此番辦理似於類風陋俗一為廓清至各專祠之有祠產者計六千七百三十九處除僅數祭享外其有餘者共計七百六十處皆取具遵依為教養子弟傾助族中貧乏婚喪之用不得以為訟費除仍飭地方官隨事留心如有於族中藉祠欲費者即加懲治以杜訟風外臣復通行嚴示此後敢有仍建同姓公祠及一族崇祠設有荒遠不經之木主匾聯者即將祠屋入官並重治其罪其有於譜首仍載荒遠不經之始祖字樣者亦一併嚴行治罪俾知名分不容少假寬典難以再違互相提撕共為遵守庶妄誕之風永息而尊親之義益明矣所有臣欽遵

諭旨查

辨完竣緣由理合恭摺 奏明並將查明祠譜各數分別
彙開清單恭呈 御覽

請復絲劬出洋舊例疏 乾隆二十九年楊廷璋
定長

閩浙總督臣楊廷璋福建巡撫臣定長謹 奏為遵

旨議奏事乾隆二十九年欽奉 上諭臣等跪誦之下

仰 聖主遠鑒如神為閩閩籌畫生計至周且備伏

查絲劬一項數年以來價值原極昂貴乾隆二十四年仰

蒙 聖主俯准臺臣李兆鵬等條奏將絲劬嚴禁出洋

並准部議將綢緞絹一律嚴禁節年實力遵行在案原使

留有餘於內地俾物多價平於民生日用有裨臣等於奉

文飭禁後竊意從此絲價自必日減乃自二十四年禁止

出洋以來迄今五載不特絲價依然昂貴未見平減且偶

值蠶事收成稍薄價值較前更昂推原其故總由 國家

承平日久百數十年生齒日繁民間需用日多物價有不
得不長之勢誠如 聖諭生齒衍繁取多用宏蓋物情
自然之勢也查向來販洋絲劬均不過土絲及粗糙之絲
祇堪供織土綢而不足供紗緞絞羅之用祇應粗絲價昂
而細絲價減今無論粗細絲劬一律昂貴其非關販洋已
可概見且不特此也即以產地而論浙省之杭嘉湖及紹
屬之諸暨產絲最盛每屆新絲出後江浙粵閩販絲客民
挈本而來者甚多所產粗絲頃刻得價售費農民轉覺生
計裕如今奉禁之後絲價未見其平而粗絲消售轉滯於
農民反有轉售不逮之苦再查外番船隻載貨挾貨達赴
內地原欲以其所有易其所無而各番首重者絲劬今因
禁止販洋近年粵閩貿易番船甚覺減少即內地販洋商
船亦多有停駕不聞者在外番因不能置買絲劬運來之

貨日少而內地所需洋貨價值亦甚見增昂是中外均無裨益且等悉心體察竊謂絲價之低昂總視乎蠶事之豐歉蠶收檢則絲價自平蠶收歉則絲價自貴固有自然之勢今蒙 聖主燭照民隱 勅下臣等悉心體察應否即行開禁臣等伏思禁洋而絲價過減有益於民自宜永行禁止今奉行已五年之久絲價迄未平減徒使外番以織絨不供紛紛請濟而民間又乏銀貨流通之益實屬兩無所便伏讀 聖訓以天下之物供天下之用尤為通商便民大哉 天言誠中外一體之達樞也應請

特頒諭旨將販洋絲勅照舊弛禁但開禁之後若不定以限制竊恐商民惟利是圖知外番缺絲已久一經弛禁必紛紛不惜重價買運新絲赴洋內地不免有絲少價翔之患似非稱物平施之道伏查乾隆二十八年琉球國請

聖主格外施恩准其歲買土絲五千觔二蠶湖絲三千觔此係出自 特恩且係一國一歲所買之數今絲禁一開商販船隻多寡雖屬難定每船各有配買絲觔一至外番積少成多即足供其織絨 臣等愚昧之見應請定以海洋內外商船每船止許配搭土絲一千觔二蠶粗絲一千觔此外不許多帶並不許兼帶細絲影射蔽混俟三年之後內地不致絲少價昂再請酌增觔數至絲觔既蒙 恩准其帶往則外番俱可自供織絨其內地已織之絨縲紗羅絲棉等項應請仍照舊例禁止出洋留為內地之用以免價值騰貴之虞其稽查之法應責成各海口關及沿海各汛口文武員弁逐層查驗先令海關驗明絲觔粗細觔兩如無影射多帶情弊收稅後即予印照註明絲觔數目再令出口之處及沿途各海汛文武官弁會同查

驗屬貨照相符方准開行設有奸商於額定酌數之外多帶及將細絲混作粗絲並夾帶紬緞紗綾絛棉等項者不拘何處查出即照原例按多帶酌數分別充軍徒杖治罪況口文武官弁如不實力稽查致有影射侵漁之弊即分別失察故縱嚴揭叅懲如此弛禁之中定節制之限或亦因時調劑之一法也緣奉 諭旨飭議謹就 臣等管見所及恭摺議 奏

陳陝西地方積貯疏 乾隆二十九年 明德

陝西巡撫 臣明德謹 奏為敬陳地方之情形籌備常平之積貯仰祈 聖鑒事竊照陝西一省東通晉豫西連甘蜀分設六府六直隸州內惟西鳳同三府地處中原田疇平行民尚殷庶邠乾二直隸州稍偏西北界接甘省雖山多田少地瘠民貧但係通遼大路彼此接濟尚不為難

至於省城南北皆係山鄉省南數十里即係終南山東連驪山秦嶺華嶽西接太白岐山以至棧道綿亘七八百里漢中一府興商二直隸州及所屬一十九州縣均在其內其間層巒疊嶂萬山叢集路徑崎嶇跋涉艱險深林茂密虎豹盤踞故各邑居民稀疎耕讀之外別無營運生計率多貧窶然處處皆有山泉農民種稻不慮缺水且山中出產竹木可以為薪炭粉椽子可以救饑兼之漢丹二水可達楚豫萬一有所需用撥運亦易是漢興商三府州屬倉儲尚非緊要惟省北百餘里即係北山袤延千有餘里延安一府鄜綏二直隸州及所屬一十四縣坐落其中在在土坡沙嶺草木不生泉源絕少舟車難通而小民墾耕者皆係山坡之地平原曠土十無一二每值三春恒慮缺雨夏秋多患雹霜其北至米脂靖邊兩路出山則係沿邊榆

林府屬五州縣及延安府屬之靖定二縣地雖平坦又多沙漢是延榆鄜綏四府州屬不惟本地倉儲關係緊要抑且仰藉於西同一帶而西取同鄜乾地居適中本省隣省咸資撥濟其常平積貯所關尤重必須儲蓄充裕方稱有備無患陝省額貯常平倉穀雖有二百七十餘萬石但邊陲之民每歲春耕籽種口糧借資於官倉者常不下數十萬至百餘萬石若額貯之數再有虛懸倘遇水旱不齊必致無所倚恃日與司道再四籌酌並商之督臣楊應琚謹列籌備倉儲以裕民食五事敬為我 皇上陳之

一各郡應建設府倉以廣儲蓄也查各府首縣雖設有常平然一官經理不能過多且所屬州縣環處郡城府倉有備遇有需用撥運亦便故各省多有建設府倉廣為積貯以備應用者前因山西太原首府及甘肅蘭州等九府未

建府倉經臣先後 奏請俱蒙 聖恩俞允添設於民

食大有裨益今陝省之西延鳳漢榆同六府尚未建設府倉似屬無備若以捐監倉費添建倉廩以捐監之糧積貯即倉則各府常平漸致充裕民食有所利賴查西安府為省會首郡同州府地當扼要應請西同二府各收捐監穀八萬石延安鳳翔榆林三府地方遼濶屬邑較多應請各收捐監穀五萬石漢中一府屬邑雖有但地方潮濕難以多貯應請收捐監穀三萬石以上六府共請收捐監穀三十四萬石定為六府常平額貯均以收捐監糧補足其所需倉廩亦動收捐倉費陸續建蓋再查延榆二府屬州縣例准外省生俊報捐今添設府倉延榆二府自應照屬邑一例辦理惟西安等四府屬向止許本省生俊捐納今新添府倉與州縣本省存貯者不同若必待本地生俊捐足

恐致徒延數月難收實效應請將西鳳漢同四府亦照延榆二府之例均准外省生俊報捐其該四府所屬州縣仍照舊例止准本省生俊捐納再知府不時盤查出投捐之人未便令其守候滋弊所有府倉收納監糧應令各該首縣查收以專責成如此則六郡常平無需請動帑項不數年間各府積貯均屬有備矣

一西安等五府州捐監穀數應畫一減定以收實效也查乾隆九年議定捐監穀數係各就彼時市價酌定今經二十年糧價較前漸昂是以生俊裹足不前報捐寥寥於倉儲無甚裨益且原定亦有未甚允當之處即如西安府屬與鳳翔府屬地方毘隣乃西安府原定每俊秀一名捐穀一百一十四石零而鳳翔府屬原定一百九十一石零多寡懸殊即同州府屬捐穀一百九石零邠乾二州屬捐穀

一百二十二石至一百二十九石零以目今之時價而論均屬浮多查榆林府屬每俊秀一名捐穀八十石七斗五升延綏二府州屬捐監穀數較多經臣暨布政使方世雋先後奏請均照榆林一例收捐荷蒙 恩允各在案今

查西同鳳邠乾五府州屬常平積貯不惟貯備本地抑且撥濟隣省與其動缺之後撥帑採買莫若量減捐數俾生俊踴躍爭先庶 帑項不致糜費而地方又省採買之繁應請將西同鳳邠乾五府州屬捐監穀數俱照延綏一例定為八十石七斗五升其庫增附等生俱照例遞減如此則要地倉儲投捐有人積貯充裕民食有賴矣

一省會重地收捐監糧應變通辦理以濟兵民也查西安省會為清漢重兵駐劄之地商民輻輳烟戶衆多食指浩繁首邑咸長二縣雖額貯常平倉穀各七萬五千石除兵

民借欠撥運平糶外實貯在倉者僅各二萬餘石會城要地實屬無備若非廣開捐路省會倉儲斷難充裕應請將咸長二首縣照依延榆綏之例亦准外省生俊一體報捐其餘外州縣仍照舊例止准本省生俊捐納如此則省會重地倉廩有備於兵精民食均有裨益矣

一直隸鄭州及所屬收捐監穀應照延榆綏一例辦理也查直隸鄭州及所屬之洛川宜君中都三縣均在省北金鎖關之外其氣候之寒冷山地之瘠薄與延榆綏三府州無異榆林府屬原定每俊秀一名收捐監穀八十石七斗五升延綏二府州屬亦經先後奏准照榆林一例減定並准外省生俊一體報捐各在案惟鄭州及所屬三縣俊秀一名當收捐穀一百三十九石四斗故生俊人等無不舍多就少均赴延榆等縣報捐以致輸納無人倉儲虛懸目

查該州縣等常平額貯自八千石至一萬七千餘石不等
四川縣僅額貯穀五萬四百餘石止抵大縣一邑額貯之
數兼乾隆二十三四等年以來收成稍歉兵民借欠以及
平糶未買糧石外現在四邑僅存穀三萬餘石若不亟請
調劑設有需用必致撥自他處不惟糜費錢糧抑且緩不
濟急邠州及所屬三縣既與延榆綏地方情形相同應請
照延榆綏三府州之例盡一減定每俊秀一名收捐監穀
八十石七斗五升其庫增附等生照例遞減並准外省生
俊一體報捐則山僻難運之地倉儲均得充裕而民食咸
資利賴矣

一沿邊七邑平糶倉穀應量加買補以實倉儲也查延安
府屬之靖邊定邊二縣榆林府屬之榆林葭州懷遠神木
府谷等五州縣地處沿邊土多沙漠各色農民全賴租種

邊外地畝以資生計春出秋歸歲以為常故民多貧窶戶
鮮蓋藏每年春耕除借給籽種口糧外尚需平糶以濟民
食且邊外鄂爾多斯蒙古偶有荒歉亦需官倉接濟沿邊
倉儲必須廣為儲備方於地方有益是以前撫臣陳宏謀
於乾隆二十二年奏准將沿邊七邑原定常平倉穀各五
萬石在案惟因原議內有遇有平糶解價報撥字樣以致
數年以來平糶價銀均各解司撥用且查沿邊七邑邊內
地畝雖屬沙瘠而邊外地土在在肥沃每遇豐收農民頗
有餘糧若必俟捐監補足其額缺較多之處難望收捐足
額而平糶之價又不買補未免失時且旋捐旋糶不行買
補即捐足之處三年之間仍致虛懸終無充足之日應請
嗣後沿邊七邑春糶價銀俱照例解置府庫俟秋收後查
明倉儲充實收成稍歉之處將糶價解司報撥如額數尚

虧年豐價平之處即動用糶價買補運倉如此分別辦理則倉儲得以充實而邊氓有所利賴矣以上五條臣為地方積貯關係緊要起見謹會同陝甘督臣楊應琚合詞恭摺具 奏是否有當伏乞 皇上睿鑒訓示

請禁採買短價疏 乾隆二十九年 尹繼善

兩江總督臣尹繼善謹 奏為請禁採買短價之弊以除民累事竊查直省各州縣設立常平倉積貯穀石定例春糶秋還蓋以平市價而防紅朽也各州縣於秋成買補之時自應按照時價秉公採買方不致於病民乃向來州縣採買倉糧多有按回強派不照市價平買而承辦之書役家人又藉端勒派尅扣分肥其中弊端不可枚舉臣與撫臣屢行出示嚴禁復於巡行之使隨地隨時留心體訪業將失察書役短價病民之町貽縣知縣陳述祖及無為州

知州嚴道洪臣與安撫臣託庸先後題參並將舞弊之書
役嚴行審擬從重治罪以昭炯戒且思採買穀價本有區
別如撥缺存倉米穀應動司庫正項採買原定每米一石
止銷銀一兩二錢此係歷來定例遵行已久自應仍行照
例辦理至平糶米價各處情形不同皆係責時出糶價平
買補價值原屬寬餘本不至於累民其所以受累者皆因
立法不善稽查不嚴故得騰混作弊臣與江南江西三省
撫臣藩司悉心籌酌立定章程於應出糶之時令將價值
先行詳明及屆秋成應行買補之時其出境採買者令將
往何處採買產地時價若干先行詳報稽查其在本地採
買者令將現在按照時價實在發價若干先行詳明本管
道府加結轉詳臣等留心查核訪問民間如糶價買價與
所報不符即嚴行提究審實將道府一併嚴參如果公平

採買俟買補運倉之後價有盈餘全數解司充公遇有撥
缺存倉米穀應動正項採買其定例一兩二錢之數不敷
時價者奏明於所存盈餘內撥補此且嚴行立法者清理
積弊之情形也伏思去歲安撫臣託庸奏請將安省存倉
穀石碾米運京一摺欽奉 諭旨與其輾轉挹注名異

實同又何如即以此留之民間俾饔飧裕仰見 聖

主誠求保赤念切痼疾凡所以為民會計者無微不至

恩旨下頒凡窮鄉僻壤無不交相傳頌感激涕零夫州

縣採買米穀即使公平交易我 皇上尚慮挹彼注此

必致米價踴騰閭閻滋累况每歲春糶秋運又何可從容
官吏短價營私以致年年受困臣雖殫竭心力立法禁止
但恐奉行不力日久懈弛且日所轄三省前弊多不能免
仍恐他省亦有類此者仰懇 聖恩特頒諭旨將短價

採買之事勒石嚴禁俾大小官吏觸目警心庶可永除民累抑且更有請者每年平糶倉穀定例存七糶三原今各州縣知有界限不至漫無節制以至倉廩空虛並非令其每歲必拘定出糶三分也乃各省州縣每多拘泥定例一屆青黃不接毋論年歲豐歉價值低昂紛紛詳請糶三上司衙門亦因與例相符多有批准就一省計之存穀不下一百五六十萬石若拘糶三之例每歲必須糶出四五十萬石一屆秋成設遇歲有不登糶價不敷採買即不能歸還原額縱使豐收而民間生穀止有此數各屬同時採買至數十萬之多亦恐未價踴騰致妨民食有不得不量為變通之勢且再四熟籌既欲防範於今日使買補不至累民更宜慎重於先時使倉穀不輕出糶應請嗣後各省州縣凡存倉米穀除實過歉收之年米價過昂非糶三可濟

民食者不妨額外多糶准其據實具詳酌量辦理其尋常歲稔價平之年不必拘定糶三之例或竟可全數停糶或止須酌糶十之一二總看各處情形臨時酌辦庶春間少賣一石則倉內多一石之積儲秋成少買一石則民間多一石之米穀似於民食倉庾兩有裨益臣仰遵 聖訓體察民艱既於此事知之甚確不敢不愷切敷陳伏乞 皇上訓示

請申明囤積之禁疏 乾隆二十九年 王 檢

甘肅布政使臣王檢跪 奏為請申明囤積之禁以便民生以裨荒政事竊查例載富戶於收倉之後如遇有積至十萬石不即售賣任該地方官勒令出糶並設法稽查毋令商販囤積居奇又例載先給銀錢預定糧石巧取射利者按律治罪等語蓋以奸徒壟斷有妨民食是以酌加議

三於秋成之後公平糶賈此實有益無損之舉可以
毋庸查禁夫小民終歲勤劬全賴禾稼登場上供國課下
給身家幸過年豐穀賤之時富民出資以易糧貧民因糧
而獲利儲之本地可備緩急於將來運之他方亦可通有
無於隣境即使其敢於居奇開墾增價地方官察知情形
亦無難喻之以理繩之以法出其所有而減價以糶則本
地之糧仍供本地之用豐歉皆易於調劑矣今地方官不
繙例義凡遇收買糧食概行查禁在嚴實之家固不敢違
例干罪而小民日食所需取資於此人勢不得不多方求
售於是狡黠之徒勾結胥役非彼莫擅任意捐勒既巧取
其糧石又復腹削其價值此穀賤傷農鄉民所以有熟荒
之諺也若偶遇災被銀米兼賑而市無餘糧所領之折色
艱於購買則辦理更覺掣肘且愚以為奸徒牟利法固宜

賑而商民懼糧事本無榮仰祈 皇上勅下直省督撫
轉飭地方官除積糧至十五萬石敢於閉糶暨先給銀錢
預定糧石仍按律治罪外其餘聽民自便如有混行查禁
以致地棍蠹役因而滋事者照失察衙役犯贓例議處如
此分別辦理庶幾商民皆利豐歟得宜酌盈濟虛有便於
民生而亦可裨于荒政矣

請緝捕青成大員疏 乾隆二十九年 輔 德

江西巡撫兼提督銜 臣 輔德謹 奏為武職同任緝捕應
並青成大員以收實效事竊惟設兵原以衛民安民重在
靖匪先於乾隆二十六年前任江蘇撫臣陳宏謀奏請通
省營員皆令督率兵丁協同緝捕則境內竊匪不獲於捕
役即獲於兵丁等因經部議覆通飭遵行嗣於上冬陳宏
謀復經奏請營兵所獲賊犯到案狡供許令同原獲營員

簡審則真賊自無所逃如係良民被誣並無贓證兵丁營員各無可辭等因恭奉諭旨著照所請行欽遵亦在案伏查川縣額設捕役多者不過十名少者數名偵緝勢難周到是以責令營兵協緝城守有駐防大路有塘汛耳目衆多足資巡緝立法非不盡善如果實力遵行匪賊終難遁跡惟是外省奉行多有不力而不力之故由於氣習未除文武之不能一體也蓋將弁多以竊案不比強劫有疎防之虞而兵丁不同捕役又無提比之例既為賞罰所不及即每置身於局外且以文員最忌營汛獲賊通報上司印形其短慮生嫌隙遇有營兵犯竊一經縣捕拏獲即不肯以革伍在先及該營自拏並營縣會拏等情代為捏飾難免處分更恐縣將營拏之賊故行審訊轉訊營兵多事妄拏輒多畏葸以致兵丁意中熟慮之賊與目中日見

之賊並某捕參縱分贓皆概括於胸臆而莫敢出諸口蓋恐該營將弁聞知不以為奮勉轉以為多事而其本管營汛間有不法兵丁或陰通匪類或得規縱放或坐地分贓轉不知畏干處分時加嚴察即有迫於奉文飭緝者率多任聽兵丁或孥曾經犯案之人或將乞丐堵塞其實緝獲正賊正贓者甚少此武員之狃於積習相沿不能一體也至於州縣每以兵丁獲賊形已之短遽將賊犯巧為出脫現已定有會同原獲營員質審之例固已不敢逞其伎倆乃又有矯枉過正明知兵丁妄孥以奉上司文檄飭緝曲作周旋故留地步徒使兵丁滋擾良民此又文員之故習多端不能一體也臣以為欲收同任緝捕之實效必使文武一體又必責成於督撫提鎮大員然後可宣明賞罰破除故習而使其全局轉移咸歸於一體臣嘗細察地方文

武官弁大槪不論職分之應為惟視上司之意指大員鄭重其事聲情自然振動且到任以來屢經通飭將文武情習逐一指出禁其心存吟域示以所定賞罰並移商南昌贛州兩鎮臣除拏獲山賊隨時酌量給賞外如係多贓及搶劫重案或能舉發捕役奉縱分贓及查獲積高者守兵立拔馬戰馬戰記拔外委外委記補千總千總以上則另記名以備酌保至於巡緝弁兵俱飭該管營員抹派仍令不時考察毋許藉端嚇詐挾嫌妄拏其並不實力久無根獲者即令營員隨時懲處畧仿比緝之意俾知賞罰皆由於此而又皆由提鎮視定更無輟轉退縮有所希冀畏懼不得不認真查緝計自春間會辦以來營兵拏獲賊匪將及百業又拏獲進軍三名俱經飭縣審辦其有任兵藉捕索詐混拏私拷之把總二員兵丁數名亦經查出立即斥

革重處是弁兵之功過原可隨時勸懲豈可以一二弁兵不肖即謬慮干連公然袖手遂致因噎廢食第弁兵之勤惰固在將備稽查而將備之錮習端在督撫提鎮之隨時振刷并以賞罰為鼓舞之權則徹底貫通一無扞格查各省督撫每屆年終已未獲盜若干及作何懲勸之處已經大學士兼管總督事務臣尹繼善奏經部覆通行外合無仰懇 聖恩 特頒諭旨再令提鎮一體親加督率

不時就近查考以課其實並令各就本營情形酌示賞罰共相實力整飭則積習更易破除良法不同故套不惟竊匪難以漏網且捕役亦懼營兵攻發不敢包庇即歷年通緝各犯未必不併弋獲臣因文武緝捕務求實效起見不揣冒昧謹恭摺具奏伏祈 皇上聖鑒訓示

請仲民枉以杜刁風疏乾隆二十九年吳綬詔

山東道監察御史白吳綬詔謹 奏為請禁收准民詞仍
批原問州縣覆審會審之積習以伸民枉以杜刁風事竊
照州縣一官與民最親凡詞訟全賴審理然往往有聽斷
未平下情冤抑因而赴懇上司者亦有逞刁健訟於結案
後復飾詞越懇者近湖南新寧縣民傅帙罷市一業伏讀
聖諭以該署府既不親審又不委員仍發交本縣辦
理將原告禁押致成事端仰見 睿照如神無微不燭

惟外省積習大抵皆然且每聞府道以上收准呈詞多批
本州縣自行審詳即別委他員亦令原問官會審如本年
二月間山東高唐州民高上忠所控知州馬而良各款蒙
欽差侍郎臣四達前往查審結案而據原呈所稱則
一控於東昌府仍批本州查報兩控於巡撫批行司道仍
皆委員就本州會訊以致有不審被告獨因原告等詞其

明證也夫小民如果受屈必由州縣偏向徇私執意難回亦不得已而上懇今反令覆審則其忿怒摧折固不待言若既委他員仍復會同審訊在原問官勢必自護前非且差役皆其牙爪氣奮刑求小民恐無能畢其詞委員又何從證其枉扶同賄徇亦遂不得不然非惟冤抑莫伸更增一誣告之罪及上司依詳批結而立業已不可動搖矣吏使情真罪當而屢祈於原質之庾重科於會鞠之地且不足以及服其心又况健訟者流藉口本官不肯自翻已案捏詞越漬屢許不休則訟端更無由平刁風因之益熾甚至脅衆肆橫抗官玩法種種事端皆緣此起殊非所以仰體我皇上慎重民猷明聽庶獄之至意也伏思督撫等統制全省若因所屬呈懇即據一而之詞輒行關提猶憲於民未便至於道別分巡府則尚轄自當察其情偽重者

親為提審餘亦為委別員隔訊以免寃縱乃向來積習相沿未有禁止臣請 勅下直省督撫以下凡收准民詞與本州縣有干涉者即委該管道府覆審其道府收准民詞即吊取卷業提集人證親行訊究至案內如遇有檢驗查勘應差委等事令其遴選賢員不得仍會同原問官如此庶小民之抱屈者易於伸雪其捏飾越愬者待上司別訊得實加以重懲自必俯首畏法不敢行險僥倖而刁風亦可少息矣

皇清奏議卷五十五